

## Bisset Arctic Minerals!

Fas muitala Arctic Minerals "erenomáš gávdnosiid" birra Biedjovákkis, ja áigu álggahit ruvkke fas.

Lea dál mannan 12 jagi dan rájes go dát fitnodat, dalle namain Arctic Gold, osttii vuoigatvuodaid ovddeš Bidjovagge Gruber maŋŋá. Dán áiggis leat oainnut Guovdageainnus rievdan, álggos lei eahpadus, maŋŋil šattai vuostálastin. Váikko fitnodat lea mángii geahččalan oastit olbmuid suohkanis, lea suohkanstivrra eanetlohku guktii hilgon ruvkke. Dan maŋŋá lea suohkan bidjan Biedjovággi-guovllu ruovttoluotta industriijaguovllus luondduguovllun. Maŋimus suohkanválggas lei dušše okta listu mii háliidii ráhpat ruvkedoibmii.

Dattetge ruotelaš spekulanttat eai vuollán. Ođđa jodihemiin sii álget fas ja áibbas beroškeahttá álbmoga oainnus celkejit: "*Mii háliidit dieđusge buori dialoga, sihke Guovdageainnu suohkaniin, boazoealáhusain ja buot eará beroštumiiguin geat leat dáppe birrasiid.*" Man bealljeheapmi lea vejolaš šaddat? Ii gávdno oktage mainna gulahallat. Ruvke šáddá dušše jus stáhta mearrida hilgot suohkana oainnu ja čadahit ruvkke bákkuin.

Arctic Minerals lea juo geavahan mánga miljovna ja oasuseaigádat vurdet oažžut rudaideaset ruovttoluotta. Ii sáhte vuordit eara, sii eai beroš earás go iežaset baŋkokonttos. Vearrát lea ahte mineráladirektoráhta, mii lea almmolaš orgána Ealáhusdepartemeantta vuolde, ii ge váldde álbmoga oainnu vuhtii, muhto fas addá Arctic Minerals ođđa ohcankonsešuvnnaid, guovllus maid suohkan lea cealkán ahte galgá báhcit ráfis.

Mii lea nu dehálaš servodahkii ahte ferte bilidit luonddu ja hoigat boazodoalu eret dološ guovlluin? Golli. Maid mii galgat dainna? Máilmmi gollebuvtadeamis ii mana go logenare proseantta ávkálaš doaimmaide. Muđui manná činaide ja gollebárrat baŋkoboavssain, dušše spekulášuvdnii. Dađe eambbo moivi máilmmis, dađe eambbo goargŋu golleháddi. Nu guhká go golli jerrojuvvo, de lea dárbu, cealká Norsk Bergindustri, mii váimmolaččat doarju gollespekulanttaid. Eará doaibmi ja plánejuvvon ruvkkiid Finnmárkkus, mas goivet veaikki, ruovddi, kvartsihta, nefelinsyenihta ja rávttu, sáhtta bealuštit dainna ahte minerálat leat ávkkálaččat ja soaitá maid nannet "ruoná molsuma". Gollebuvtadeamis fas ii leat eará doaibmá go vuoitu spekulánttaide, geat eai beros mo váikkuhusat leat lundui ja eará ealáhusaide.

Sii lohpidit čuđiid bargosajiid. Dát lea álo seakti mii galgá oažžut geafes suohkaniid ja fágasearvvit dohkehít ruvkke. Dán áššis lea sáhka logenare jagi barggus. Dat ii leat guhkit áiggi go dan rájes go suohkanstivra vuosttaš háve hilgui ruvkke. Jus dalle livčče dohkehan ruvkke, de dat bargosajit livčče juo heaittihuvvon dahje heaitima vuolde. Áidná mii midjiide livččii bahcán livččii vel eanet billiduvvon luonddu ja guohtoneana.

Arctic Minerals mielde lea hui erenomaš ahte muhtin guovlluin lea gávdnon gitta 10 g golli juohke tonnas geađgi. Eará sániiguin 10 miljonoasi golli ja 999990 miljonaasi bázáhusat. Jus sii oktiibuot gávdnet 10 tonna golli, das lea dál háddi sulli 5 miljarda ruvnnu. Sáhtta šaddat moadde miljárdda ruotelaš spekulánttaide, midjiide šaddá dušše 5 miljovna tonna bázáhusat ágibeavái.

12 jagi lea Arctic Minerals uhkidan min. Ii leat sivva dasa ahte mii galgat ain eallit dáid uhkádusaid vuolde. Mii gáibidit ahte Stáhtá, Ealáhusdepartemeantta bokte, addá čielga dieđu ahe Guovdageainnu suokanstivrra mearrádušat galget dohkkehuvvot, ja ahte buot ohcanlobit guohtoneatnamis galget heittihuvvot.

Ávjovári Luonddugáhttenlihttu  
Piera Jovvna Somby, jodiheaddji  
Svein Lund, čáli